

ԷՂԻԿ ԽԱԼԱԹԻ ԽԱՐԱԶՅԱՆ

2011թ. դեկտեմբերին, կյանքի 70-րդ տարում վախճանվեց Երևանի պետական համալսարանի աշխարհագրության և երկրաբանության ֆակուլտետի, ռեգիոնալ և պատմական երկրաբանության ամբիոնի վարիչ՝ Էղիկ Խալաթի Խարազյանը:



Հայաստանի երկրաբանական գիտությունն ու ծառայությունը մեծ կորուստ կրեցին: Կյանքից վաղաժամ հեռացավ անվանի երկրաբան, ՀՀ ռեգիոնալ երկրաբանության լավագույն գիտակ ու քարտեզագիր, ԵՊՀ աշխարհագրության և երկրաբանության ֆակուլտետի պատմական և ռեգիոնալ երկրաբանության ամբիոնի վարիչ, երկրաբանահանրաբանական գիտությունների թեկնածու, դոցենտ Էղիկ Խալաթի Խարազյանը:

Էդ. Խարազյանը ծնվել է 1941 թ. Գորիս քաղաքում, սովորել է Լոռու մարզի Կուրթան գյուղի դպրոցում: 1963 թ. գերազանցության դիպլոմով ավարտել է ԵՊՀ երկրաբանական ֆակուլտետը: 1967 թ.՝ ՀԽՍՀ ԳԱ ասպիրանտուրան՝ “Նորագույն հրաբխականություն և տեկտոնիկա” մասնագիտությամբ: 1967–1976 թթ. աշխատել է ՀԽՍՀ ԳԱ երկրաբանական գիտությունների ինստիտուտում որպես կրտսեր գիտաշխատող, 1976–2001թթ.՝ ՀՀ երկրաբանական վարչությունում՝ երկրաբանահանույթային պարտիայի պետ, արշավախմբի ավագ երկրաբան, 2001–2005թթ.՝ երկրաբանական վարչության գլխավոր երկրաբան, 2005 թ-ից՝ պատմական և ռեգիոնալ երկրաբանության ամբիոնի վարիչ: 1970 թ. պաշտպանել է թեկնածուական ատենախոսություն, 2005 թ. շնորհվել է դոցենտի կոչում:

Էդ. Խարազյանը հեղինակ է 70 գիտական հոդվածների, բազմաթիվ գիտաարտադրական հաշվետվությունների և վերջին 30 տարիների ընթացքում հանրապետությունում կազմված ու հրատարակված տարամասշտաբ երկրաբանական, տեկտոնական ու հրաբխագիտական քարտեզների: Նրա ուսումնասիրությունները զգալի դեր խաղացին բացահայտելու հրաբխականության տեղաբաշխման, կազմի ու զարգացման օրինաչափությունները ՀՀ-ի և հարակից Ախալքալաքի և Քարավաճառի տարածքներում:

Գիտնականի ուսումնասիրություններում առանձնահատուկ տեղ են գրավում ՀՀ տարածքի երկրաբանահանույթային ու քարտեզագրական աշխատանքները, որոնք օգնեցին բացահայտելու տարածքի տարահասակ ապարների տարածման սահմաններն ու փոխհարաբերությունները, տեկտոնիկայի և մագմայականության զարգացման առանձնահատկությունները:

Էդ. Խարազյանի աշխատանքային գործունեության արդյունքների գնահատման հարցում կարևորվում է այն, որ նա գիտական ուսումնասի-

րություններին համընթաց խոշոր ներդրում ունեցավ հանրապետության երկրաբանական ծառայության կազմակերպման գործում՝ երկար ժամանակ ղեկավարելով երկրաբանական վարչության երկրաբանական ծառայությունը և հատկապես երկրաբանահանույթային ու քարտեզագրական աշխատանքները: Նա իր աշխատանքային գործունեության բազում տարիների ընթացքում հավաքել ու մշակել է հսկայածավալ դաշտային փաստացի նյութ, կազմել է ՀՀ տարածքի մեծ մասի 1:50 000 մասշտաբի երկրաբանական քարտեզներ, Երևանի և հայկական ատոմակայանի տարածքների խոշորամասշտաբ քարտեզներ: 2005 թ. կազմել ու հրատարակել է ՀՀ երկրաբանական քարտեզը (1: 500 000), համահեղինակ է Արցախի երկրաբանական քարտեզի (1:750 000), եղել, տեսել ու նկարագրել է ՀՀ տարածքի համարյա բոլոր տեղամասերի բազմաթիվ առավել հետաքրքիր կտրվածքները և այդ առումով, հիրավի համարվում էր Հայաստանի երկրաբանության «քայլող հանրագիտարան»:

Մեծ է Էդ. Խարազյանի ավանդն երկրաբան մասնագետների պատրաստման գործում: Նրա թողած գիտական, մասնավորապես քարտեզագրական ժառանգությունից օգտվում են և կօգտվեն երկրաբանների շատ սերունդներ:

Էդիկ Խալաթի Խարազյանի՝ անսահման բարի, պարզ, ազնիվ, անաչառ ու ընկերասեր մարդու, հարգված գիտնականի և վաստակաշատ դասախոսի հիշատակը վառ կմնա մեր հիշողության մեջ:

*ԵՊՀ ռեկտորատ,
Աշխարհագրության և երկրաբանության
ֆակուլտետի ղեկանատ,
Պատմական և ռեզիոնալ
երկրաբանության ամբիոն
“Գիտական տեղեկագիր” խմբագրություն*